

Fluras sper via

Autor(en): **Carnot, Maurus**

Objektyp: **Article**

Zeitschrift: **Igl Ischi : organ della Romania (Societat de Students Romontschs)**

Band (Jahr): **23 (1932)**

PDF erstellt am: **13.09.2024**

Persistenter Link: <https://doi.org/10.5169/seals-881519>

Nutzungsbedingungen


Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.



Fluras sper via

da P. Maurus Carnot.

L' Ave Maria sill' alp

Con bi 's ei sill' alp, cur ch' il zenn della val
Tarmetta sils aults igl angelic signal!
Las sbrenzlan las steilas, tgei bi tarlischar!
Ils aunghels comparan sils pezs per cantar.

Dal crest tunava autras seras
Sur l' alp quieta la canzun.
Oz stat amiez las neblas neras
Tut en anguoschas il signun.

La val ei tut plena dal tribel stemprau,
Ei tuna, rampluna, cametgs han sfraccau
Baul dretg, baul seniester in pegn sco burniu,
Ch' il tschess sez ha griu ed il muvel megiau.

Sil crest il signun uss' conta cun possa:
«Maria Regina, pertgira la vall!»

Tras fiug e tras flomma: «Speronza nossal!»
Tras neblas resuna la vusch de metal.

La val vegn clara, neblas neras
Ston seretrer dals cuolms naven.
En dultscha pasch sco autras seras
Si dalla val resun' il zenn.

Las steilas retuornan, tgei bi tarlischar!
 Ils aunghels comparan sils pezs per cantar.
 «Maria Regina», la dultscha canzun
 Ensemen culs aunghels aunc cont' il signun.

Buna luna tut igl onn!

Buna luna tut igl onn,
 Franc mi' olma, dat mai donn,
 Ei la regla de nies Gion.

Buna regla de nies Gion:
 Neiv' ei, plov' ei senza cal,
 Il suleagl stat sur la val,
 Buna luna tut igl onn!

Fa la dunna de vilau,
 Tugna sco il nausch stemprau,
 Gion ha maina lamentau.

Buna regla de nies Gion:
 Quei stemprau mo lai vargar!
 Suenter vegn ei ton pli clar,
 Buna luna tut igl onn!

Squetschan deivets mintgaton,
 Fan vischins tut quei ch' ei pon:
 Sevilar dei'n quels che ston!

Buna regla de nies Gion:
 Viver tscheu, quei para grev,
 Mo jeu fetschel tut pli lev:
 Buna luna tut igl onn!

Splendur de mia val!

In di d' atun: la val entira
 Tut sco in trest desiart,
 Buc in utschi ell' aria stgira,
 Buc ina flur egl iert!
 E sper la geina verda steva,
 Prendend comiau da mei,
 La cara mumma e bargeva:
 «Che Dieus pertgiri tei!»

«Stei bein, stei bein, o mumma cara!»
 Hai detg, lur' aunc dus betschs —
 Con biala oz la val compara
 Als égls de larmas bletschs!
 Mirond anor' aunc ina gada,
 Hai detg: «En num de Diu!
 O cara val, o val beada,
 Schi bi eis ei negliu!» —

Sun returnaus la primavera,
 Biars onns ein stai vargai,
 Con bi, con verd e clar ch' ei era,
 Tuts praus cun flurs ornai!
 E dapertut utschals cantavan,
 Il tschiel sco in cristal,
 Sco aur las pezzas splenduravan,
 E plein suleagl la val!

Mo sper la geina verda steva
 La mumma buca pli.

Siu cor sut ina crusch durmeva
 Pil giuvenessendi.
 Tscharnend culs égls la val sclarida,
 Hai detg: «En num de Diu!
 Co ei la tarlischur sparida,
 Schi stgir eis ei negliu!»

Udis, Grischuns, co 'ls pegns ramuran?

Udis, Grischuns? Nos pegns ramuran
 Entuorn las fossas dils babuns,
 Sin cuolms e greppa, sut las evlas,
 O quels fideivels pegns grischuns!

Nos vegls han rut lur frastga verda,
 Cur' ch' els marschavan tiel combat.
 Ed il Grischun egl jester auda
 Il pegn, che sur la casa stat.

Quel ch' ha plantau nos pegns l' entschatta,
 Lai mai sebetter a bandun.
 Schi ditg sco aunc in pegn ramura,
 Stat ferm sidretg in brav Grischun!

